

# En l'ensaina dal giubileum

## Tratg bilantscha positiva da las occurrenz

■ **(anr/gc) En ses pled introductiv tar la radunanza da delegads e delegadas da sonda a Cuira ha il parsura da la Lia Rumantscha (LR), Vincent Augustin, taxà la cunvivenza linguistica sco in stgazi spezial ch'i saja da tgirar cun tut quità.** Perquai hajan ins envidà *Andreas Wieland* al podi da radunanza per ch'el possia dar pled e fatg. Ins veglia tscher-tgar da schliar en dialog la dispita ch'el haja chaschunà. Convivenza pretendia ch'il linguatg maioritar (tudestg) en noss chantun respectia il rumantsch minoritar. Quai haja mancà fitg tar *Andreas Wieland*, siond ch'el haja taxà il rumantsch sco folclora.

### Fatg bler per il rumantsch

Per la davosa giada porta cuss. guv. *Claudio Lardi* ils salids da la regenza a la LR. En ses temp d'uffizi hajan ins introducì la matura bilingua (rumantscha-tudestga) en pliras scolas medias, alfabetisà tar numerusas scolas per rumantsch grischun ed acceptà la lescha da linguas. – *Doris Caviezel*, cussegliera municipale, po preschentar insaquant resultats en favur dal rumantsch cun era resguardar quella lingua tant en la scola primara sco scolina a Cuira – che fetschia insumma bler per il rumantsch.

### Quint prest equilibrà

Il quint annual da la LR è prest equilibrà. El serra – tar entradas ed expensas da 3,6 milliuns francs – cun in pitschen minus da bun 9000 francs. Las mesiras da spargn (reducì il dumber da plazzas, sminuì contribuziuns a las uniuns regiunalas, externalisà informatica e contabilitad e raziunalisà l'interpresa) hajan meglierà considerablmain la situaziun finanziaria. Vitiers vegnia ch'ins saja entrà en discurs cun cuss. fed. *Didier Burkhalter* pervì da pudair survegnir dapli meds si da Berna. – Era *Martin Cabalzar*, schefredactor da La Quotidiana, punctuescha che – ultra da la LR – dovria era la anr (Agentura da novitads rumantscha) dapli meds per ch'ella stoppia betg reducir plazzas cu sias reservas sajan duvradas si, quai che LQ sentissia fitg, essend che be paucs redactors hajan da far ina gasetta dal di. El deplorescha che la preschientscha da la LR en las medias tudestgas e naziunalas saja tschessada ils davos onns. Senza grond PR na giaja i betg. – Il quint è vegnì approvà – sco il preventiv 2011 – che quinta era cun in deficit.

### Revista sin il giubileum

Avant in onn è il giubileum pils 90

onns da la LR vegnì instradà. La finamira è stada traidubla: cuntanscher e motivar il pievel rumantsch, lavurar en furma da projects (er per recaltgar ulteriurs meds) sco era far politica da linguatgs e da scola. En tut è enturn 50 occurrenz las pli diversas vegnidas arranschadas. La conclusiun è stada Convivenza – l'inscunter cuminaivel da la LR, PGI e Walservereinigung, nua ch'ins ha nuà buns contacts, malgrà tutta diversidad.

### Planisà per 2011

La LR ha circumscribì extendidamain l'orientaziun strategica e prendì en mira bleras activitads ed acziuns per l'onn proxim. In grond champ cumpiglia era la linguistica applitgada, la furmaziun en in vast senn ed in program considerabel d'art e cultura.

Anteriur cuss. naz. *Martin Bundi* è da l'opiniun da forza sa concentrar sin main temas. El postulescha da puspè inagiada patratgar vid ina scuntrada che haja già a ses temps grond resun. Era propo- neda el dad inoltrar ina nova instanza per dapli meds finansials a Berna e da far da temp en temp ina analisa da success e deficits da l'entira acziun insumma.